

09 NOV 2003

Kajian-Dayak/I

PEMIMPIN DAYAK BOLEH BERI INPUT MENGENAI MINORITI BUMIPUTERA

KUCHING, 9 Nov (Bernama) -- Kerajaan pusat patut menjemput pemimpin masyarakat Dayak memberi input terhadap kajian khas mengenai pendapatan isi rumah minoriti Bumiputera yang sedang dijalankan di Sarawak dan Sabah bagi memperoleh hasil yang lebih objektif.

Setiausaha Agung Dewan Perniagaan dan Perindustrian Dayak Sarawak, Datuk Peter Minos hari ini berkata pembabitan pemimpin masyarakat penting dalam menangani punca utama kemiskinan di kalangan masyarakat Iban dan Bidayuh di kawasan luar bandar Sarawak.

"Alangkah baiknya jika kita mengetahui butir-butir terperinci tentang jumlah serta peratusan minoriti seperti Dayak, Kadazandusun dan Orang Asli dari segi tahap kemiskinan dan paras pendapatan mereka, lalu membandingkannya dengan apa yang dinikmati oleh golongan majoriti. Tetapi ini tidak memberi erti jika penemuan yang dibuat berat sebelah," katanya kepada Bernama di sini.

Beliau berkata, oleh itu, kerajaan patut memanfaatkan kepakaran yang dimiliki oleh persatuan atau parti politik yang berasaskan suku kaum Dayak dalam kajian tersebut.

Minos, yang pernah menjadi presiden Persatuan Dayak Bidayuh Kebangsaan (DBNA) berkata penemuan melalui kajian itu perlu digunakan dalam mengatur strategi untuk mengatasi kemunduran masyarakat Dayak, termasuk dalam bidang korporat.

Kata beliau, kajian tersebut perlu terlebih dahulu mengenal pasti punca yang menyebabkan wujudnya masalah kesihatan, kekurangan kemudahan asas seperti bekalan elektrik dan air serta sekolah yang tidak ditadbir dengan baik sebelum mencari jalan untuk mengatasinya.

Ketika membentangkan kajian Separuh Penggal Rancangan Malaysia Kelapan bulan lepas, bekas Perdana Menteri Tun Dr Mahathir Mohamad berkata kerajaan akan menggubal rancangan yang lebih khusus bagi mengurangkan kemiskinan di kalangan suku kaum minoriti di negara ini berdasarkan kajian tersebut.

Beliau berkata fasa pertama kajian itu yang meliputi sembilan kumpulan minoriti menunjukkan bahawa suku kaum Penan, Kenyah dan Kajang di Sarawak mencatatkan kadar kemiskinan yang paling tinggi.

Di Sabah pula, suku kaum Rungus, Sulu dan Orang Sungei merupakan kumpulan masyarakat paling miskin, sama tarafnya dengan kedudukan Orang Asli di semenanjung.

Minos juga berkata sebagai contohnya, suku kaum Bidayuh menghargai usaha yang dibuat oleh kerajaan bagi meningkatkan taraf hidup mereka, namun jumlah anggota masyarakat itu yang membabitkan diri dalam bidang perniagaan masih kecil.

-- BERNAMA

CJ SP MOZ